

Augsburg, 29. September 1556

An Johannes Oporinus

UB Basel, Fr. Gr. I 11, fol. 200r-v.

Steinmann Nr. 692.

Lit.: Husner S. 150 (mit Auszug).

S. 19 Septembris scripsi tibi responsum de sententia D. Antonij Fuggeri. idque Argentinam misi ad D. Sebaldum, vt ibi acciperes, nisi anteuerertisses. Sed quia vereor ne literae serius eò perlatae fuerint, idem argumentum est necesse repetere κεφαλαιωδῶς.

I.

D. A [ntonius] Fuggerus pollicetur 50 f. honorariae et 300 mutuae pecuniae. Mutuam hac conditione, vt tribus proximis Francofordianis nondinis centenos restituas, et 24 exempla Zonarae mittas, quae inter amicos distribuat.

II.

vt Zonaram graecè et latinè e regione siue integris folijs siue diuisis columnis vtroque charactere eleganti, et charta mediana et bona imprimas, totumque opus ad Cal[endas] Martias Anni 1557 absoluas.

III.

Hae conditions si tibi placuerint, rescribito. Tum mandabitur Vilhelmo Prechtero Argentinensi, vt accepta a te syngrapha 350 f. statim tibi numeret. idque puto intra mensem posse fieri, nisi tabellarij opportuni defuerint. Interea si opus est, credo te ab amico tantum pecuniae ad tantillum tempus impetraturum.

Plus impetrari non potuit, et haec ipsa aegrè, credo ob morbum tum instantem, et nunc afflagentem senem non sine periculo. Membraneis codicibus non est opus. Atque haec de D. Antonio.

Quod ad me attinet, vtinam vestras tabellarius triduo serius huc venisset. vt primum tomum integrum tibi mittere potuisse. Nunc 11 terniones retinere sum coactus, quos nondum in crebris et occupationum et valetudinis impedimentis, perlegere potui. In his quae misi, si qua errata μνημονικὰ aut incogitantiae deprehenderis, oro vt pro candore tuo corrigas. Errare mihi non est nouum, nec vlla ferè hora elabitur, quin aut semel atque iterum interpellaveris, aut opus planè de manibus deponere cogar. Indices non relegi. quos tuo arbitratu vel abolebis vel emendabis. In graecis pauca anno, sed quae anno, numeris graecae scripturae respondent, caetera, latinae.

Tomos singulos seorsim imprimi cum suis indicibus propè necesse est. Quare velim eos ita excudi, quasi nouum opus esset.

De tomo secundo certi nihil polliceri possum, quod is a puero meo nondum est absolutus, nequid a me legi caeptus. sed maturabo, quantum potero. Spero me eum quoque ante Decembrem absoluturum. Interea 1 et 3 strenue imprimito. quod si secundum etiam auspicari ante illos absolutos animus est, terniones aliquot cum proximo tabellario mittam, dum reliquos absoluerem.

Nostrates Bibliopolae neque literas neque libros vel a te vel a Birckmanno mihi attulerunt, sed dixerunt vtrunque missurum esse. credo eos insalutatis vobis, vt nullam officij rationem habet hoc hominum genus, discessisse.

Chroniatae paralipomena vertere non est animus, quod perpetuis istis aerumnis valetudini meae plus decedit, quam rei accedit, si pace D. Antonij eo labore supersedere licuerit. alioqui ex syngrapha cogor. Vale. Augustae 29 Septembris Anno 1556.

Hiero[nymus] Wolfius
Tuus.

Tabellario satisfeci, saccum per occasionem remittito, vt aliquando secundum quoque tomum
tutius in eo mittere possim.